

Turkiston

1925-yildan chiqqan boshlagan

«Kamolot» yoshlar ijtimoiy harakati Markaziy Kengashining nashri

www.turkiston.uz

2014-yil 26-noyabr, chorshanba № 95 (15837)

СТРАТЕГИК ҲАМКОРЛИКНИ ЯНАДА МУСТАҲКАМЛАШ ЙЎЛИДА

Аввал хабар қилинганидек, Ўзбекистон Республикаси Президенти Ислам Каримов Қозоғистон Республикаси Президенти Нурсултон Назарбоевнинг таклифига биноан 24-25 ноябрь кунлари расмий ташриф билан ушбу мамлакатда бўлди.

Икки давлат раҳбарлари анъанавий дўстлик ва очиқлик руҳида ўтган музокаралар чоғида мамлакатларимиз ўртасидаги муносабатларни ривожлантиришнинг асосий масалалари, савдо-иқтисодий, маданий-гуманитар ва бошқа соҳаларда ўзаро ҳамкорликни янада кенгайтириш ва мустаҳкамлаш истиқболлари, шунингдек, томонларни қизиқтирган долзарб минтақавий ва халқаро масалаларни муҳокама этдилар.

Ислам Каримов ва Нурсултон Назарбоев турли соҳалардаги ўзаро ҳамкорликни 2013 йилнинг июнь ойида Тошкентда имзоланган Ўзбекистон Республикаси билан Қозоғистон Республикаси ўртасида Стратегик шериклик тўғрисидаги шартнома руҳида изчил ривожлантириш икки мамлакат халқларининг туб манфа-

атлари, уларнинг тарихий ва маданий яқинлиги, вақт синовидан ўтган мустаҳкам дўстлик ва қардошлиқ ришталарига мослигини, минтақада тинчлик ва барқарорликни мустаҳкамлаш, уни барқарор ривожлантиришга хизмат қилишини таъкидладилар.

Ўзбекистон Президенти таъкидлаганидек, томонлар мазкур ташрифга олий даражадаги мулоқотларнинг мантиқий давоми, Ўзбекистон билан Қозоғистоннинг кўп томонлама муносабатларини таҳлил қилиш учун қулай имконият сифатида қарамоқда.

Маълумки, глобал ривожланиш беқарорлик билан кечмоқда, жаҳон молиявий-иқтисодий инқирози оқибатлари ҳамон кескинлигича қолмоқда. Шу нуқтаи назардан қараганда, савдо-иқтисодий ва инвестицион ҳамкор-

ликни янада фаоллаштиришдан ҳар икки томон ҳам манфаатдор экани қайд этилди. Президентлар ўзаро ҳамкорликни мустаҳкамлаш учун икки мамлакатда ҳам улкан салоҳият мавжудлигини, нуфузли халқаро ва минтақавий ташкилотлар, институтлар ва форумлар доирасида Ўзбекистон – Қозоғистон муносабатларини янада ривожлантиришга томонларнинг интилиши муштарак эканини таъкидладилар.

Давлат раҳбарлари Афғонистондаги вазият юзасидан ҳам фикр алмашдилар. Ушбу мамлакатда тинчликка эришилиши минтақамиз ва унинг ташқарисида ҳам хавфсизлик ҳамда барқарорликни мустаҳкамлаш учун муҳим аҳамият касб этиши қайд этилди.

Ислам Каримов ва Нурсултон Назарбоев Марказий Осиёда мустаҳкам тинчлик ва барқарор иқтисодий тараққиётни таъминлашда Ўзбекистон ва Қозоғистоннинг умумий масъулиятини инobatга олган ҳолда, терроризм, экстремизм, наркотиклар ва қурол-яроғнинг ноқонуний айланиши,

шунингдек, минтақавий ҳамда халқаро хавфсизликнинг бошқа хавф ва таҳдидларига қарши курашишда ўзаро ҳамкорликни кучайтиришга келишиб олдилар.

Президентлар музокаралар чоғида иқтисодий муносабатларни изчил ривожлантиришга алоҳида эътибор қаратдилар.

Қозоғистон Ўзбекистоннинг муҳим савдо шерикларидандир, икки томонлама савдо алоқалари жадал ва изчил ривожланиб бормоқда. Глобал иқтисодий жараёнлардаги кескин ўзгариш ва олдиндан айтиб бўлмайдиган ҳолатларга қарамасдан, мамлакатларимиз ўзаро савдо алоқалари даражасини нафақат сақлаб қолиш, балки янада ривожлантиришга эришмоқда. Хусусан, 2013 йил якунлари бўйича ўзаро товар айирбошлаш ҳажми 14 фоиз ўсиб, 3,2 миллиард АҚШ долларидан зиёдни ташкил қилди. Жорий йилнинг ўтган тўққиз ойида эса бу кўрсаткич 3 миллиард доллардан ошди.

(Давоми 2-саҳифада)

Kun voqeasi

Жаҳон опера юлдузлари Ўзбекистон сахнасида

Опера мусиқали драматик санъат турларининг чорраҳасида жойлашган ижодий жанр бўлиб, унда драматургия, мусиқа, тасвирий ва рақс санъати шакллари яхлит композиция ҳосил қилади. Операнинг адабий асоси — либреттодаги воқеалар мусиқа ва драматургия билан шакллантирилади. Қаҳрамоннинг ички ҳиссий кечинмалари, дарду қувончини жонли ва ўта таъсирли қилиб етказиб берувчи ария ва каватина каби тугал мусиқий лавҳалар барча санъат мухлисларини ўз сеҳрли оламига олиб кириб, кучли ҳиссиётлар уммонига фарқ қилади, эстетик завқ бағишлаб, тана ва руҳга бирдек маънавий ҳордиқ беради. Пойтахтимизда жаҳоннинг кўплаб ёш опера ижрочиларига дунёнинг энг нуфузли сахналарида италян операси ижроси бўйича ўз қобилиятини намойиш қилиш имкониятини тақдим этаётган «Competizione dell' Opera» XIV халқаро танлови бошланди.



3-саҳифага қаранг

Zulfiya tavalludining 100 yilligiga

ҲАЁТТИ ВА МУҲАББАТТИ КУЙЧИСИ

Президентимиз Ислам Каримовнинг 2014 йил 31 октябрдаги «Ўзбекистон халқ шоири Зулфия таваллудининг 100 йиллигини нишонлаш тўғрисида»ги қарорини ўқиб, жуда севиным.

Қарорда белгиланган тадбирлар — шоиранинг сайланма асарлари, инглиз ва қорақалпоқ тилларига таржима қилинган шеърини тўпламларининг нашр этилиши, ҳаёти ва ижоди ҳақида мушоиралар, адабий анжуманлар ўтказилиши, китоблар чоп этилиши, ҳужжатли фильм яратилиши замирида юксак эҳтиром нишонсини кўрдим. Бу биз учун гўзал байрам, устознинг барҳаёт ижодидан куч-қувват, илҳом олиш учун яна бир улкан имконият бўлди.

Устозимизнинг бутун ҳаёти, залворли ижоди, шогирдларига меҳру муҳаббати, тонг нуридай мусаффо вафо ва садоқати кўз ўнгимда қайтадан жонланди. Зулфияхонимнинг меҳригиёси, оҳанрабои бор эди. У билан бир бор суҳбатлашган киши шоиранинг меҳру муҳаббати, муомаласига мафтун бўлар, бу дилкаш учрашувни умрбод эслаб юрарди.

(Давоми 4-саҳифада)

Ilm sarhadlarida

Илм-фан тараққиётнинг асосидир

Мамлакатимизда замонавий илм-фан ютуқларидан самарали фойдаланиш, ишлаб чиқаришга илғор технологияларни жорий этиш ва шу орқали иқтисодиётимизни янада юксалтириш масаласига алоҳида эътибор қаратилмоқда. Давлатимиз раҳбарининг 2008 йил 15 июлдаги «Инновацион лойиҳалар ва технологияларни ишлаб чиқаришга татбиқ этишни рағбатлантириш борасидаги қўшимча чора-тадбирлар тўғрисида»ги қарори соҳа ривожига му-

ҳим аҳамият касб этмоқда. Бу жараёнда ёшларнинг иштироки қандай? Техника ва технологиялар соҳасида илмий тадқиқот олиб бораётган тендошларимиз учун қандай имкониятлар яратилган? Абу Райҳон Беруний номидаги Тошкент давлат техника университети доценти, техника фанлари номзоди, халқаро экология ва хавфсизлик фанлари академияси академиги Саиджаббор Саидқосимов билан суҳбатимизнинг мавзуси шу ҳақда бўлди.



5-саҳифага қаранг

«ОБУНА — 2015»
 Ўзбекистон ёшларининг бош наشري — «Turkiston» 2015 йилда ҳам сизнинг маслақдошингиз, ҳамроҳингиз бўлади.

ОБУНА ИНДЕКСИ: 203

«TURKISTON»ГА ОБУНА БЎЛИНГ!

СТРАТЕГИК ҲАМКОРЛИКНИ ЯНАДА МУСТАҲКАМЛАШ ЙЎЛИДА

(Давоми, бошланиши
1-саҳифада)

Томонлар ҳамкорликни янги марраларга олиб чиқиш учун катта имкониятларга эга. Шу муносабат билан икки мамлакат ҳукуматларига ўзаро товар айирбошлашни янада кўпайтириш, маҳсулот турларини кенгайтириш, юкларни ташиш учун қулай шароитлар яратиш, тадбиркорлик субъектлари ўртасида ҳамкорликни ривожлантиришга доир чораларни кучайтириш топширилди.

Ўзбекистон Республикаси ва Қозоғистон Республикаси ўртасида 2007-2016 йилларда иқтисодий ҳамкорлик стратегияси талабларини ўз вақтида ва сифатли бажариш учун Икки томонлама ҳамкорлик бўйича ҳукуматларaro кўшма комиссия фаолиятини янада кучайтириш зарурлиги қайд этилди.

Транспорт ва транспорт коммуникациялари, чунончи, мамлакатларимизнинг улкан транзит салоҳиятидан фойдаланиш соҳасида ўзаро манфатли ҳамкорликни кенгайтириш икки томонлама муносабатларнинг яна бир муҳим йўналиши ҳисобланади. Ислон Каримов юкларни ташишда, жумладан, темир йўл транспорти ёрдамида олиб ўтиш ва етказиб беришда

ўзаро мақбул тариф преференцияларини тақдим этиш муҳимлигини таъкидлади. Бу транспорт коридорларининг рақобатдошлигини ошириш, улардан янада самарали фойдаланиш имкониятини яратади.

Музокаралар жараёнида Оролни кутқариш халқаро жамғармаси фаолияти ҳам кўриб чиқилди. Ушбу жамғарма минтақа мамлакатларига Орол фожиасидан азият чекаётган ҳудудларни экологик соғломлаштириш ва уларнинг ижтимоий-иқтисодий муаммоларини ҳал этишга қаратилган илмий-амалий лойиҳа ва дастурларни амалга ошириш бўйича ўзаро ҳамкорлик қилиш учун ўзига хос имкониятлар яратмоқда.

Ўзбекистон ва Қозоғистон Орол денгизи ҳавзасидаги мамлакатларга ёрдам кўрсатиш бўйича ҳаракат дастурининг учинчи босқичини самарали амалга оширишга йўналтирилган минтақавий ва халқаро саъй-ҳаракатларни қўллаб-қувватлаган ва бундан буён ҳам қўллаб-қувватлайди. Шу муносабат билан Қозоғистон Республикаси Оролни кутқариш халқаро жамғармасига Ўзбекистон Республикаси раислиги доирасида шу йилнинг октябрь ойида «Орол денгизи минтақасидаги экологик офат оқибатларини

юмшатиш бўйича ҳамкорликни ривожлантириш» мавзусида Урганчда ўтказилган халқаро конференция якунларини юксак баҳолади.

Халқларимизнинг маънавий яқинлиги ва кўп асрлик анъанавий муносабатларига асосланган маданий-гуманитар соҳадаги ҳамкорликни кенгайтириш масалаларига ҳам алоҳида эътибор қаратилди.

Ташриф асносида ўзаро ҳамкорликни янада мустаҳкамлашга қаратилган қатор ҳужжатлар имзоланди.

Ўзбекистон Президенти Қозоғистон Президенти ҳамроҳлигида Остона шаҳрида яқинда очилган «Назарбоев-марказ» кўп тармоқли илмий-таҳлилий ва ижтимоий-маърифий давлат муассасасини бориб кўрди. Ушбу марказ ўзига хос фонд-музей бўлиб, бу ерда қозоқ халқининг тарихи, маданияти ва замонавий турмуш тарзини, шунингдек, мамлакат Президентининг фаолиятини акс эттирадиган экспонатлар сақланмоқда.

Давлатимиз раҳбари Қозоғистон мустақиллик йилларида эришган ютуқларни қайд этар экан, таълим, маънавият, ёшларни ватанпарварлик, миллий ва умуминсоний қадриятларга ҳурмат руҳида тарбиялаш бўйича амалга оширилаётган ишларга юксак баҳо берди.

Олий даражадаги Остона учрашувлари қозоқ халқининг буюк байрами – Мустақиллик куни арафасида ўтгани билан чуқур рамзий маънога эга. Ўзбек ва қозоқ халқлари ҳаёт ва давр синовидан ўтган ишончли кўшнилари, қардошлардир ва шундай бўлиб қолади. Айнан шу боис Ўзбекистон ва Қозоғистон раҳбарларининг ҳар бир учрашуви халқларимиз томонидан муҳим тарихий воқеа сифатида қутиб олинади. Зеро, Ўзбекистон ва Қозоғистон ўртасидаги ҳамкорлик ривожини шиддат билан ўзгартириб бораётган бугунги мураккаб шароитда нафақат узоқ муддатли истиқболли, балки бутун минтақамизни барқарор ривожлантириш ва фаровонлигини таъминлашда ҳам муҳим ўрин тутиши билан аҳамиятлидир.

Шуни ишонч билан айтиш мумкинки, Ўзбекистон Президентининг Қозоғистонга ушбу ташрифи ва унинг якунлари мамлакатларимиз ўртасидаги муносабатларда янги имкониятлар очади, халқларимизнинг манфаатларига хизмат қиладиган ҳамкорликнинг янги қирраларини рўёбга чиқаришда муҳим аҳамият касб этади.

Анвар БОБОЕВ,
ЎЗА махсус муҳбири

Тошкент – Остона – Тошкент.

«Камолот» ёшлар ижтимоий ҳаракатининг «Ўзбекистон Республикаси Конституцияси — мамлакат тараққиёти ва жамият фаровонлигининг ҳуқуқий кафолати» мавзусидаги тарғибот лойиҳаси давом этмоқда.

ТАРҒИБОТ ДАВОМ ЭТМОҚДА

Лойиҳа доирасида Урганч давлат университетининг бир гуруҳ фаол талабалари Боғот туманидаги таълим муассасаларида тарғибот ишларини олиб борди.

Тарғибот тадбирлари Боғот маиший хизмат ва ахборот технологиялари, энгил саноат, қишлоқ хўжалиги, иқтисодиёт касб-хунар коллежларида, тумандаги 1-, 2- ва 4-умумтаълим мактабларида ташкил этилди. Уларда жами 1300 нафарга яқин ўқувчи қатнашди.

Ёшларга Бош қомусимиз ва сайлов қонунчилигининг мазмун-моҳияти тушунтирилди. Сайловда биринчи маротаба овоз берадиган ўғил-қизлар бу борада ўзларини қизиқтирган саволларга тўлиқ жавоб олди.

Шаҳло САФШЕВА

Qadriyat

Самарқанд иқтисодиёт ва сервис институтида «Олтин мерос» халқаро хайрия жамғармаси, Ўзбекистон Фанлар академияси археология институти ҳамкорлигида «Ёш авлод тарбиясида халқимиз маданий мероси ва қадриятларнинг ўрни» мавзусида республика илмий-амалий анжумани ташкил этилди. Унда профессор-ўқитувчилар, талаба-ёшлар ҳамда соҳа мутахассислари иштирок этди.

Аждодлар мероси — бебаҳо бойлик

«Археологик ёдгорликлар — баркамол авлод тарбиясида муҳим манба», «Миллий қадриятлар ёш авлод тарбиясининг таянчи», «Аждодлар меросини бугунги авлодга таништиришда мутахассисларнинг вазифалари», «Халқимиз маданий мероси хорижликлар эътирофиди», «Аждодларимиз меросини сақлаш кенг жамоатчиликнинг муҳим вазифасидир» каби мавзулар доирасида фикрлашган тарихчи олим ва археологлар кейинги йилларда юртимиздаги тарихий обидалар, археологик ёдгорликларда амалга оширилган илмий-тадқиқот ва таъмирлаш ишлари тўғрисида маълумот берди. Мазкур объектларни янада чуқур ўрганиш ва сайёҳлик йўналишларини кенгайтириш борасида таклифлар билдирилди.

— Аждодларимиздан қолган маданий бойликларни асраб-авайлаш, фарзандларимизга ҳам буни ўргатиш бурчимиз, — дейди Самарқанд иқтисодиёт ва сервис институти ўқитувчиси Суҳбат Абдурахимов. — Мамлакатимизда тарихий обида ва

маданий ёдгорликлар бисёр. Улар халқимизнинг ўтмишини ўзида мутасам этган миллий қадриятларимиз намунаси, халқимизнинг бебаҳо мулкидир. Асрлар давомида бутун дунёни лол қолдириб келган кўҳна обидалар, осори атиқалар мустақиллик шарофати билан янада кадр топди. Зарур ҳолларда таъмирланди. Бу жараёнда асосан тарихий ёдгорликлар синчковлик билан ўрганилиб, уларнинг асл кўринишини сақлаб қолишга ҳаракат қилинди. Юртимиздаги юзлаб кўҳна ва бетакрор обидаларни ўрганиш, муҳофаза қилиш, келажак авлодга бус-бутун етказиш муҳим вазифалардан саналади.

Анжуман доирасида иштирокчилар Фанлар академияси археология институти фаолияти ҳамда мустақиллик йилларида Самарқанд шаҳрида амалга оширилган ободончилик ишлари ва маданий мерос объектларида бажарилган ишлар билан танишди.

Жасур РАҲМОНОВ,
«Turkiston» муҳбири

Мустаҳкам оила — жамият таянчи

Пойтахтимизда «Маҳалла» хайрия жамоат фонди томонидан «Оила институтини мустаҳкамлаш, уларни моддий ва маънавий қўллаб-қувватлашда фуқаролар ўзини ўзи бошқариш органларининг устувор вазибалари» мавзусида матбуот анжумани бўлиб ўтди.

Тадбирда маҳаллаларда ижтимоий-маънавий муҳит барқарорлигини таъминлаш, оилаларни мустаҳкамлаш, уларни ижтимоий қўллаб-қувватлаш борасида «Маҳалла» фондининг қўйи тузилмалари ва фуқаролар ўзини ўзи бошқариш органлари томонидан амалга оширилаётган ишлар муҳокама қилинди.

Анжуманда фонд тузилмалари томонидан жорий йилда Ўзбекистон Хотин-қизлар кўмитаси, Маънавият тарғибот маркази, «Оила» илмий-амалий маркази, Дин ишлари бўйича қўмита ва бошқа ҳамкор ташкилотлар билан биргаликда эрта никоҳнинг салбий оқибатлари бўйича маҳаллаларда 66 мингдан ортиқ тарғибот тадбирлари ўтказилиб, 7 миллион аҳоли жалб этилгани алоҳида таъкидланди. Шу билан биргаликда, жорий йилда маҳаллаларда ташкил этилган «Ота-оналар университетлари» томонидан ота-оналарнинг ҳуқуқий,

маънавий-ахлоқий билимларини ошириш бўйича 73 мингдан ортиқ, никоҳланувчиларни тиббий кўриқдан ўтказиш бўйича 62 мингга яқин тарғибот ишлари олиб борилгани маълум қилинди.

Тадбирда таъкидланганидек, «Соғлом бола йили» давлат дастури доирасида ижтимоий муҳофазага муҳтож бўлган 230та ёш оиланинг никоҳ тўйлари ҳамда икки юз нафар кам таъминланган оила фарзандларининг суннат тўйлари ўтказишга қўмақлашилди. «Маҳалла» фонди тизимида жорий йилда фуқаролардан келиб тушган мурожаатлар асосида тўққиз мингга яқин юртдошимизга 3 миллиард 223 миллион сўмлик моддий ёрдам кўрсатилди. Меҳрибонлик, саховат ва мурувват уйларидаги 5 мингга яқин фуқаро ва тарбияланувчи, шунингдек, ижтимоий ҳимояга муҳтож оилалар, ёлғиз кексалар, уруш ва меҳнат фахрийлари, ногиронларга «Маҳалла мурув-

вати» МЧЖ томонидан ишлаб чиқарилган кийим-кечак ва бошқа маҳсулотлар тарқатилди.

Фуқаролар йиғинлари тавсиялари асосида 2485 нафар кам таъминланган, боқувчисини йўқотган оила вакиллари, ёлғиз кексалар, уруш ва меҳнат фахрийлари ҳамда ногиронлари учун республикамизнинг диққатга сазовор жойларига, истироҳат боғларига саёҳатлар уюштирилиб, 20 мингдан зиёд кам таъминланган оила фарзандларининг соғломлаштириш оромгоҳларида дам олишини ташкил этишда кўмаклашилди. Тадбирда ёшлар тарбияси, эрта никоҳ ҳамда оилавий низоларнинг олдини олиш, оилаларни ҳар томонлама қўллаб-қувватлашда «Маҳалла» хайрия жамоат фондининг ҳудудий бўлиналари, фуқароларнинг ўзини ўзи бошқариш органлари олдида турган устувор вазибалар, ушбу саъй-ҳаракатларга жамоатчиликни жалб этиш, фуқаролар йиғинларидаги жамоатчилик тузилмалари фаолиятини янада жонлантириш масалалари ҳам муҳокама қилинди.

П.ОМОНОВА

Ma'naviyat

Йилнинг энг фаол тарғиботчиси аниқланди

Пойтахтимизда «Камолот» ёшлар ижтимоий ҳаракати тизимидаги «Йилнинг энг фаол маънавият тарғиботчиси» кўрик-танловининг якуний босқичи бўлиб ўтди.

Маънавият инсоннинг қаноатидир. Бугун юртимизда барча соҳалар қатори маънавиятга ҳам катта эътибор қаратилиб, бу борада улкан ишлар амалга оширилмоқда.

Президентимизнинг «Миллий ғоя тарғиботи ва маънавий-маърифий ишлар самардорлигини ошириш тўғрисида»ги қарори ижросини таъминлаш мақсадида ушбу кўрик-танлов «Камолот» ёшлар ижтимоий ҳаракати томонидан ҳар йили анъанавий тарзда ўтказиб келинади.

«Йилнинг энг фаол маънавият тарғиботчиси» кўрик-танлови ёшлар қалбида Ватанга муҳаббат ва садоқат, инсонпарварлик туйғуларини шакллантириш, миллий қадриятларимизнинг ҳаётдаги ўрни ва аҳамиятини ҳар томонлама очиб бериш, давлатимиз сиёсатининг устувор



Рустам Назарматов олган суратлар

йўналишлари, ислохотларнинг моҳияти, қабул қилинган қонун ҳужжатлари ва давлат дастурларининг аҳамиятини тушунтириш, комил инсон тарбияси билан боғлиқ фазилат ва тушунчаларни ёш авлод онгига таъсирчан усул ва услублар орқали сингдириш мақсадида ўтказилади.

Танловнинг биринчи босқичи шу йилнинг сентябрь, иккинчи босқичи октябрь ойларида ўтказилган эди.

Минтақавий босқичда голиб бўлган 14 нафар иштирокчи пойтахтда ташкил этилган якуний босқичда бел-

лашди.

Кўрик-танлов республика Маънавият тарғибот, Миллий ғоя ва мафкура илмий-амалий марказлари, Олий ва ўрта махсус таълим, Халқ таълими, Маданият ва спорт ишлари вазирликлари, Ўрта махсус, касб-хунар таълими маркази, республика «Тасвирий ойна» ижодий уюшмаси, «Махалла» хайрия жамоат фонди, «Камолот» ёшлар ижтимоий ҳаракати Марказий Кенгаши, «Ўзбектеатр» ижодий ишлаб чиқариш бирлашмаси, республика Байналмилал маданият маркази ҳам-

корлигида ташкил этилди.

Иштирокчиларни баҳолашда уларнинг миллий ғоя тарғиботи ва маънавий-маърифий ишлар бўйича фаолиятига доир дастурлари, режалари, уларда белгиланган вазифаларнинг амалга оширилганини тасдиқлайдиган жамоатчилик фикри, ҳужжатлар сифати, ўтказилаётган ғоявий-мафкуравий, маънавий-маърифий тадбирлар ранг-баранглиги, долзарблиги, маъруза матнлари таҳлили, ўзи ўтказаетган тадбирлар йўналишига малакавий жиҳатдан мос келиши, омма-

вий ахборот воситаларидаги фаоллик даражаси, чиқишларининг савияси, таъсирчанлиги, нутқ маҳорати, таъсирчанликка эришиш йўлидаги изланишлари, тажрибаси ва ўзига хослиги, юртимиз ва дунё ижтимоий-сиёсий ҳаётидаги энг сўнгги маълумотлардан бохабарлиги каби жиҳатларга эътибор қаратилди.

«Йилнинг энг фаол маънавият тарғиботчиси» кўрик-танловининг якуний босқичи ҳар йилгидан-да қизиқарли ва таассуротларга бой кечди. Голибларни аниқлаш ҳайъат аъзолари учун осон бўлмади. Шунга қарамай, фаоллар ичидан энг саралари аниқланди. Яъни Қарши педагогика коллежининг учинчи курс ўқувчиси Наргиза Усмонова биринчи, Қўқон сервис ва тадбиркорлик касб-хунар коллежи ўқувчиси Азизахон Аҳмедова иккинчи, Гулистон давлат университети ўқитувчиси Нуриддин Саидкулов учинчи ўринга муносиб деб топилди.

— Кўрик-танловда голиб бўлиш учунгина иштирок этмадим. Ака-опаларимдан анча нарсаларни ўргандим. Кайфиятим аъло. Негаки, меҳнатнинг қадр топса, янада жўшқинлик билан ишлагинг, излангинг келади. Узоқ Қашқадарёдан отам мен билан бирга келди. Уларнинг ишончини оқладим. Бундан кейин ҳам тенгдошларимга, ёшларга, халқимизга маънавият зиёсини улашишдан чарчамайман, — дейди танлов голиби Наргиза Усмонова.

Майсара НАЗАРОВА,
«Turkiston» мухбири

Tengdoshlar ijodi

«Ватан келажаги сенинг кўлингда!»

Ёшлар ижод саройида «Камолот» ёшлар ижтимоий ҳаракати томонидан Ўзбекистон Республикаси Конституцияси қабул қилинганининг йигирма икки йиллиги муносабати билан «Ўзбекистон Республикаси Конституцияси — мамлакат тараққиёти ва жамият фаровонлигининг ҳуқуқий кафолати» лойиҳаси доирасидаги «Ватан келажаги сенинг кўлингда!» ва «Мен сайловга тайёрман!» шиори остида расмлар кўرғазмаси ташкил этилди.

Унда Марказий сайлов комиссияси, Адлия, Олий ва ўрта махсус таълим, Халқ таълими вазирликлари, Бадий академия мутасаддилари, иқтидорли ёшлар, республика тарғибот гуруҳи аъзолари иштирок этди.

Ёшларнинг мамлакат миқёсидаги сиёсий жараёнларга мустақил ва онгли муносабатини шакллантириш, уларда бош қомусимиз ва қонунларга ҳурмат ҳиссини камол топтириш, бўлиб ўтадиган сайловларга тайёргарлик кўриш ва уни ўтказиш борасида ёш сайловчилар, айниқса, илк бор сайловда қатнашадиган

йигит-қизларнинг ижтимоий-сиёсий жараёнларга нисбатан дахлдорлик ҳиссини тарбиялаш мақсадида ташкил этилган расмлар танловида Камолиддин Беҳзод номидаги Миллий рассомлик ва дизайн институти, Республика

рассомлик коллежи, Республика ихтисослаштирилган санъат мактаби ҳамда бир қатор санъат мактабларининг 400 нафарга яқин иқтидорли талаба ва ўқувчилари иштирок этди.

Тадбир доирасида Ўзбекистон Бадий академияси аъзолари — таниқли рассомлар томонидан ёшлар учун мавзу доирасида мастер-класслар ташкил этилиб, танловга старт берилди.

Тадбир иштирокчиларининг ижодий ишлари мутахассислардан иборат ҳайъат томонидан кўриб чиқилади ҳамда энг сара ижодий ишлар муаллифлари рағбатлантирилади.

Шоира НАМОЗОВА



Bunyodkorlik

Жарқўрғон қурилиш-гидротехника касб-хунар коллежи туман марказида жойлашган, бу ердан узоқроқ ҳудудда яшовчи ўқувчилар учун таълим даргоҳига қатнаш қишнинг қировли кунларида мушкуллик туғдирарди. Яқинда бу муаммага чек қўйилди. Туманнинг Деҳқонобод қишлоғида коллежнинг яна бир биноси бунёд этилди. Энди Деҳқонобод ҚФЙга қарашли маҳаллаларда яшовчи ўғил-қизлар таълим муассасасининг ушбу филиалида ўқиш имкониятига эга бўлди.

Янги иншоотлар — юрт кўрки

Мазкур бино «Агромаштаб-мирқурилиш» МЧЖ бунёдкорлари томонидан қисқа вақт ичида қурилиб фойдаланишга топширилди. Умумий қиймати 1 миллиард 577 миллион 280 минг сўмни ташкил қилган ушбу зиё масканида ўқувчиларнинг пухта билим олиши учун барча шароитлар яратилган. Жумладан, замонавий, шинам ўқув хоналари, 24x18 метр ўлчамли спорт зали, ахборот-ресурс маркази, лингафон ва компьютер хоналари замонавий илғор архитектура талаблари даражасида қурилди.

— Қишлоғимизда янги коллеж биносининг фойдаланишга топширилганидан нафақат ўқувчиларнинг узоғи яқин бўлди, балки мен каби яна сак-

киз нафар ёш ўқитувчи иш билан таминланди, — дейди коллежнинг биология фани ўқитувчиси Наргиза Ҳимматова. — Муҳими, мана шундай мухташам бинода ўқувчиларга таълим-тарбия бериш, меҳнат қилиш биз, ёшларга янада фахр бағишлайди.

Ушбу МЧЖ қурувчилари томонидан яна бир иншоот — Сарисий туманида 200 ўринга мўлжалланган поликлиника биноси ҳам қурилиб фойдаланишга топширилди. Бир миллиард 695 миллион 797 минг сўм маблағ сарфланган мазкур муассаса қурилишида жамиятнинг юз нафарга яқин моҳир қурувчиси меҳнат қилди.

Наргиза РАҲМАТУЛЛАЕВА,
«Turkiston» мухбири

ҲАЁТ ВА МУҲАББАТ КҮЙЧИСИ

(Давоми, бошланиши 1-саҳифада)

Устознинг самимияти, одамжонлиги, камтарлиги барчани лол қолдирарди. «Саодат» журналининг бош муҳаррири Зулфияхонимнинг муайян қабул кунлари бўлмасди. Шоира қизларни, айниқса, вилоятлардан келган тортинчоқ қизларни дарров қабулига чорлар, бағрига маҳкам босиб, пешонасидан ўпарди. Машқларини ўша заҳотиёқ ўқиб, бўлимига чиқарар, журналнинг навбатдаги сонига режалаштиришни топширар эди. У кишини кўргани келган шоир ва ёзувчилар, адабиёт ихлосмандлари билан узоқ суҳбатлашарди.

Зулфияхоним билан тингаш осон эди. Барчанинг фикрини тинглар, маъқулини олар, номаъқул бўлса мулойимлик билан тушунтирарди. Сезгир ва кўнгилчан шоира ходимларнинг аҳвол-руҳиятини бир қарашдаёқ англади, боисини суриштирар, мушқулини осон қилишга интиларди. Жамоа билан туғишганлардай қадрдон бўлиб кетган эди.

Зулфияхоним шеър ўқиганида одамлар жон қулоғи билан тингларди. У бу меҳр-муҳаббат ва ихлосни ҳис қилиб, бундай анжуманлардан завқ, куч-қувват оларди. Халқ муҳаббати билан бахтиёр эди, юрагида тутаётган ҳижрон дардларини шу қудрат билан енгиб яшарди. Устоз сабр-тоқат, матонат, вафо-садоқатнинг гўзал тимсоли эди.

Аёл бахти!

Мендек аёл бахтига

Тақдир маликани кўрганми лойиқ?

Халқ меҳрида, ёрман эл шухратида,

Бахтли аёл деса, ҳақли халойиқ.

Шоира 1994 йили «Дўстлик» ордени билан тақдирланганида жуда суюнган эди.

1995 йил май ойида Зулфиянинг 80 йиллик юбилеи байрамга айланиб кетди. Президентимиз Ислам Каримовнинг Зулфияхонимга қутловномаси матбуотда эълон қилинди.

Табрикномада шундай жумлалар бор эди:

«Сиз Гулбаданбегим, Зебуннисо, Увайсий, Нодирабегим каби Шарқнинг буюк фозила аёллари бошлаган аъналарни бойитиб, янги поғонага кўтардингиз. Меҳрибон ва талабчан устоз Зулфияхонимнинг маҳорат мактабидан кўплаб ёш истеъодлар баҳраманд бўлдилар.

Истиқлол руҳи сизни, ижодингизни янада яшартириб юборди. Мафтункор шеъриятингиз ёшлик нафаси билан қайта учқунланди.

Сизнинг, эл ардоғидаги етук ижодкор, моҳир таржимон, атоқли ношир-муҳаррир ва жамоат арбобининг таваллуд куни миллий байрам сифатида нишонланиши мустақил давлатимиз ҳаётида катта воқеа. Бу қутлуг сана истиқлол замонида, ёруғ кунларда ўтаётгани миллионлаб мухлисларингизнинг қувончига қувонч кўшиши жуда табиийдир».

80 йиллик юбилеи Зулфия опани яшартириб юборди, яна шон-шухратга чулғади. Шоира ўша йили «Хотирам синиқлари» дostonини эълон қилганида адабий жамоатчилик, олимлар, саксон ёшда ҳам шунчалар ўтли, алангали дoston битиш мумкинми, деб ҳайратга тушганди. Зулфия мустақиллик, эркинлик, чинакам ҳуррият келганидан ва уни кўришга, қутлашга муяссар бўлганидан бахтиёр эди. Гуриллаб ижтимоий фаолият майдонига чиқаётган ўзбек хотин-қизларининг овозини ёлқинли шеъриятига омикта қилди.

Юбилей кечасида «Туркiston» саройини ларзага солиб ҳаяжон билан ўқилган шеър — «саксон йил ловуллаб сўнмаган ўтнинг» тафти халқимиз кўнглида истиқлолга садоқат туйғуларини мустаҳкамлади.

Хуррият, келдинг-эй,

наҳотки келдинг,

Келар йўлларингда пинҳона толдим.

Менинг ота-онам, жон Ватанимда,
Элим тақдирида абадий қолдинг!

Шундай комил ишонч ва ифтихор билан ёзган эди халқимизнинг ёруғ кунларидан шод бўлган шоира.

Зулфия опа қанчаларимизга елкасини тутиб, ижод сўмоқларидан опичлаб олиб ўтиб, юксакликларга кўтарди. Паноҳига олиб, ҳимоя қилди. Ҳаволаниб кетганимизда онамиздай тергаб, қийинчиликлардан доврираб қолганимизда меҳру эътиборини аямади. Туғилган кунларида фақат гул кўтариб борардик. Гулларимизга таъриф бериб, меҳр билан нозик гулдонларга солар ва Ҳамид Олимжоннинг портрети ёнига қўярди.

1 март — Зулфиянинг таваллуд айёми мушоирага айланиб кетарди. Ҳар биримизни таърифлаб, сўз берар ва мушоирага чорларди. Аввал Ҳамид Олимжондан ўқирдик: тўрда кўр тўкиб ўтирган шоира яшариб кетар, шеърни биз билан бирга такрорларди. Сўнг Зулфиядан, ўзимиздан ўқирдик.

Устознинг меҳмонлари халқимизнинг фозилаю оқила аёллари эди. Гулга, шеър завқига чулганган хона дунё қадар кенгайиб кетар, ундаги меҳру муҳаббат, вафо-садоқат шуъалари юракларимизга ҳарорат соларди.

Зулфия опа меҳрга меҳр билан жавоб қайтарар, илтифотли эдилар. Бирор газета ёки журналда шеърлари чиқса, дарҳол кўнғироқ қилиб миннатдорлик билдирарди. Байрамлар арафасида дўстлари, мухлислари, шоир ва ёзувчиларга табрикномалар йўлларди. Уларнинг ёнларига икки оғиз илиқ сўз, икки сатргина чиройли шеър кўшиб қўярди. «Янги шеърларингизни соғиндим», «Сизни ардоқлаб», «Ёрқин ва гўзал илҳом тилайман», «Нега камнамосиз» каби самимий сўзлар ўз қўллари билан ёзилган бўларди. Турли вилоятларимизда камол топаётган шоира қизлардан мактублар келарди. Уларнинг барчасига жавоб ёзарди.

Зулфия опа жуда андишали, ҳаёли,

ҳар бир сўзини етти ўйлаб бир гапирадиган инсон эди. Бу жиҳат таҳрирларида ҳам сезиларди. Инсон муносабатлари пардали сўзларда акс этиши керак, ҳар бир инсоннинг ҳис-туйғулари илоҳий, муқаддасдир, дердилар. Ҳеч қачон баланд овозда кулганларини, бировни камситганларини кўрмаганмиз. Гийбатни-ку умуман ёқтирмасдилар.

Оила, фарзандлари, набираларига меҳрибон она эдилар. Қизлари Хулкар опанинг дилбарлиги, саранжом-саришталигидан, шеърларни равон чиройли ёд айтишларидан суюнлардилар. Ўғиллари Омон аканинг ҳурмат-эътиборидан бошлари осмонга етарди.

Шеърият Зулфиянинг юрагини катта олам, олис йўллар билан боғлади. Таниқли шоира, жамоат арбоби сифатида жаҳон минбарларида сўз айтди. Унинг «Мушоира»си шеъриятни инсоният бахту саодати, тинчлиги ва дўстлигининг буюк элчиси мақомига кўтарди. Поэзиянинг жозибаси, ўзбек тилининг камалак ранглари дунё халқларининг тилига қўчди.

Истиқлол Зулфия номини абадиётга муҳрлади. Унинг мунавар сиймоси шаҳримизнинг сўлим гўшасида қад кўтарди. Ҳар йили баҳорнинг илк кунларида кўксига Зулфия сиймосини порлатиб навнихол Зулфиялар сафимизга кириб келади. Шоиранинг ёрқин овози, ёшлиги бўлиб кўзимизни қувонтиради. Зулфиянинг боғларида навқиронлик, меҳр-муҳаббат, садоқат, нафосат, Ватанга эътиқод чечаклари очилаверади.

Элимизнинг ардоқли шоираси, замондан миннатдор Зулфиянинг ифтихор тўла овози яна қулоғимда жаранглайди:

Эъзозлар, ардоғлар учун ташаккур,

Асли Сиз офтобим, мен зийёсиман.

Тонгадиниз кулсин дорилмомон, хур,

Бахтим шул —

ўзбекнинг Зулфиясиман.

Ойдин ҲОЖИЕВА,
Ўзбекистон халқ шоири.
(ЎЗА)

Ta'limda yangilik

Бошланғич синфларга мультимедиали дарслар кўнаяди

«Соғлом бола йили» Давлат дастури доирасида мактаб ўқитувчилари учун биринчи маротаба мультимедиа иловали методик қўлланмалар яратилди. Улар 1-синфлар учун саводхонлик дарслари, она тили, ўқиш, математика, атрофимиздаги олам, рус тили ва адабиёти фанларини илғор педагогик ҳамда ахборот-коммуникация технологиялари асосида ўтиш имконини беради.



Ёрдамчи адабиётлар 410 минг нусхада чоп этилиб, мактаб кутубхоналарига etkazилди, деб хабар беради Халқ таълими вазирлиги ахборот хизмати. Ҳар бир қўлланмага замонавий дарс ишланмалари, интерфаол ўйин машғулоти ва бошқа мультимедиали ресурслар ёзилган диск илова қилинмоқда.

Давлат таълим стандартига кўра, юртимиздаги бошланғич таълим болани ақлий жиҳатдан ривожлантириши, мантикий тафаккур ва эркин фикр юритиш, бошқалар фикрини англаш, ўз фикрини оғзаки ва ёзма равишда равон баён

қилишга ўргатиши, дунёқарashi ҳамда коммуникатив саводхонлигини шакллантириши керак.

Бошланғич синф ўқувчиларига оддий, осон ва кам вақт сарфланадиган ўйин машқларидан фойдаланган ҳолда дарс ўтиши айниқса самаралидир. Методик қўлланмаларни ишлаб чиққан Тошкент давлат педагогика университети олимлари, услубчи ва ўқитувчиларидан иборат ижодий гуруҳ бу жиҳатга алоҳида эътибор қаратди.

— Бошланғич таълим боланинг саводини чиқаришдан бошланади, — дейди Респуб-

лика таълим маркази директорининг биринчи ўринбосари Абдуманноп Собиров. — 1-синф ўқув режасига шу бўйича алоҳида фан киритилган. У икки қисмдан: «Алифбе» ва «Ёзув» дарсларидан иборат. Саводхонлик дарслари учун яратилган мультимедиали ишланмаларда ўқитишнинг ўйинли шакллари ва медиатеологиялардан кенг фойдаланилди. «Ўқиш» методик қўлланмасидан эса 21та дарс ишланмаси ҳамда «Ўқиш китоби» дарслигининг мультимедиали илова-си ўрин олган. Иловада кўплаб анимация, видеоларча, кўшиқ, лугат ўйин, тест топшириқла-

ри мавжуд. Ушбу материаллардан янги мавзуни тушунтириш, мустаҳкамлаш ва такрорлаш жараёнида кенг фойдаланиш мумкин. Бу, ўз навбатида, ўқувчиларнинг таълим олиш сифат ва самарадорлигини оширишга хизмат қилади.

Математика фанидан ҳам ўқувчиларнинг оғзаки ва ёзма математик нутқи, тафаккури, хотираси ва математик тушунчалар ҳақидаги тасаввурларини шакллантириш, мустақил фикрлаш, изланиш ва хулосалар чиқаришга ундаш, дарсдаги фаоллигини оширишга қаратилган бир қанча мультимедиали дарс ишланмалари

тайёрланди. Уларда ўқитишнинг ўйинли шакллари, интерфаол методлар, ахборот-коммуникация технологияларидан фойдаланилган. Методик қўлланманинг мультимедиа варианты анимация, мультфильм, тест топшириқлари, мантикий масалалар, дам олиш дақиқалари учун мўлжалланган видеоматериаллардан ташкил топган.

Она тилидан яратилган методик қўлланмада 26та дарс учун мультимедиали илова тақдим этилади. Дарс жараёнида ўқитувчи мавзуни шу иловадаги анимация ва видеолар, электрон тест топшириқлари, мультфильмлар воситасида ўйинли тарзда тушунтиради.

«Атрофимиздаги олам» мультимедиали иловада шу фандан дарсларни видео лавҳалар, мультфильмлар, анимациялар, дидактик машқ ва ўйинлар, бошқотирмалар, тест топшириқлари, дам олиш дақиқалари учун кўшиқлар асосида самарали ташкил этиш усуллари ёритилган.

Бундан ташқари, «Соғлом бола йили» Давлат дастурига мувофиқ яратилган рус тили ва адабиёти фанларидан методик қўлланмалар ҳамда уларнинг мультимедиа иловалари, 1 — 4-синфлар учун саломатлик дарслари фанидан ўқув дастури ҳамда 5 — 9-синфларда ўтиладиган соғлом авлод асослари фанидан мультимедиа методик тавсиялар ҳам ўқитувчиларда катта қизиқиш уйғотади.

Наргиза УМАРОВА,
«Turkiston» мухбири

Илм-фан тараққиётнинг асосидир

(Давоми, бошланиши
1-саҳифада)

— Тошкент давлат техника университети нафақат техника ва иқтисодий йўналишлари бўйича кадрлар тайёрлайдиган етакчи олий таълим муассасаларидан, шу билан бирга илм-фан ва ишлаб чиқаришни ривожлантиришда ҳам йирик илмий-тадқиқотлар маркази ҳисобланади. Айни пайтда университетда қандай илмий изланишлар олиб борилмоқда?

— Университетимизда бакалаврият бўйича етти, магистратура бўйича ўн беш йўналишда кадрлар тайёрланмоқда. Кейинги йилларда университет давлат бюджети ва sanoat корхоналари томонидан молиялаштирилган икки юздан ортиқ лойиҳаларни амалга оширди. Унинг натижасида ўнлаб монография, дарслик, ўқув қўлланмалар чиқарилди ва ўқув жараёнига татбиқ этилди. Ҳозирда таълим муассасамизнинг олимлари Навоий ва Олмалик кон-металлургия комбинатлари билан шартнома асосида илмий изланишлар олиб бормоқда. Бу ишлар кўламини кенг бўлиб, ҳар йили кафедраларимиз томонидан 500-600 миллион сўмлик илмий тадқиқотлар амалга оширилади. Тадқиқотларда тўртинчи курс талабалари, магистрантлар, изланувчи ва мустақил тадқиқотчилар иштирок этади. Университетимиз корхоналар билан корпоратив ҳамкорликда маълумотлар базасини яратган. Унда корхона учун долзарб бўлган муаммолар базаси мавжуд бўлиб, уларнинг ечимини топиш учун илмий тадқиқотлар олиб борилади. Магистрлик диссертацияси мавзусини талабанинг ўзи танлайди. Бу жараён унинг илмдаги дастлабки дадил қадами ҳисобланади. Кон-металлургия соҳасида илмий тадқиқот ўтказишни қўя турайлик, бу соҳада меҳнат қилишнинг ўзи кишидан нафақат чуқур билим ва кўникма, балки мустақам ирода, кучли руҳий тайёргарликни талаб қилади. Чунки баъзида ернинг минг метргача бўлган чуқурлигида иш олиб боришда тўғри келади. Шундай муҳитда ишлаш учун тадқиқотчи ҳар томонлама тайёр бўлиши керак. — Мана шу талабларга жавоб берадиган ёшларнинг кўплиги бизни мамнун қилади.

— **Ўзбекистон Республикаси Вазирлар Маҳкамасининг фармойиши билан жорий йилнинг 27 — 29 ноябрь кунлари Тошкент давлат техника университетида «Кон-металлургия тармоғининг муаммолари ва инновацион ривожланиш йўллари» мавзусида халқаро илмий-амалий анжуман бўлиб ўтади. Унда Словакия, Вьетнам, Россия, Қозғоғис-**

тон, Қирғизистон ва бошқа давлатлардан олим ва мутахассисларнинг қатнашиши кутилмоқда. Халқаро конференциянинг айнан Ўзбекистонда бўлиб ўтиши юртимизда бу соҳа қай даражада раванқ топаётганининг исботидир. Шундай эмасми?

— Инновация янгиликка интилиш, уни амалиётда қўллаш деганидир. Биз мустақилликкача бу сўзни билмас эдик. Бугун ҳар бир соҳада янгиликни кузатиш мумкин. Саноатнинг асосий таянчларидан бўлган кончилик ва металлургия тармоқлари ҳам истиқлол шарофати билан ривожланди, модернизация қилинди, уларга инвестициялар жалб этилди.

Олмалик кон-металлургия комбинати, Навоий кон-металлургия комбинати, «Ўзбеккўмир» акциядорлик жамияти, Деҳқонобод калий ўғитлари заводи, Ўзбекистон металлургия комбинати — бу корхоналарнинг барчасида янгиликни юз берди. Илгари қандай маҳсулот чиқарсангиз, у жаҳон талабларига жавоб берадими, йўқми, сотилар эди. Янгиликка қўл уриш, жаҳон даражасига кўтарилишга интилиш деган нарса бўлмаган. Механизм шундай эди. Бугун ахвол бошқача. Корхоналаримиз замон талаблари асосида ишляпти. Ўзбекистонда миллий инновацион тизим мавжуд бўлиб, у давлатимиз томонидан мунтазам қўллаб-қувватланмоқда. Соҳага оид қатор қарорлар қабул қилинган. Натижада ривожланиш янги босқичга кўтарилди.

Мазкур конференция кончилик ва металлургия тармоқларининг инновацион тараққиётини қўллаб-қувватлаш ва уни таъминлашга қаратилган. Унинг асосий ғояси ер ости бойликларидан оқилона ва комплекс фойдаланиш, муҳофаза этиш, қайта ишлаш ҳамда тайёр маҳсулотга айлантириш технологиясини такомиллаштиришга қаратилган илмий тадқиқотлар натижасини оммага етказишдан иборат. Шунингдек, анжуман устозимиз, Ўзбекистонда хизмат кўрсатган фан арбоби, Фанлар академияси академиги Ваҳоб Раҳимовнинг хотираси ва 80 йиллигига бағишланади. Кончилик илмини ривожлантириш, бу соҳада мутахассисларни тайёрлашда устознинг хизматлари жуда катта.

— **Конференцияда ёшларнинг иштироки қандай бўлади?**

— Илмий-амалий анжуманда тўртта долзарб соҳага оид илмий тадқиқот ишларининг якунлари кўрилади. Ер ости бойликларидан комплекс ва оқилона фойдаланишнинг конгеологик, геомеханик ва маркшейдерлик жиҳатлари, ер ости бойликларини ўзлаштиришнинг экологик ва замонавий технологик муаммолари, металлургия ишлаб чиқариш ва



Рустам Назарматов олган сурат

минерал хомашёни қайта ишлаш технологиясини ривожлантириш истиқболлари, кон-металлургия ишлаб чиқаришнинг модернизациялаш, механизациялаш ва автоматлаштириш муаммолари шулар жумласидан. Унда ўттиздан зиёд мамлакат олимлари, ўзбекистонлик 150 нафардан зиёд тажрибали олим ва эллик нафардан ортиқ ёш тадқиқотчининг илмий ишлари натижаси эълон қилинади. Конференцияда, айниқса, магистрларнинг ишларига алоҳида аҳамият қаратилган. Чунки улар учун бундай нуфузли анжуманда қатнашишнинг ўзи катта воқеа. Дунё олимлари қаршисида туриб, ўз ишини ҳимоя қилиш ҳаммага ҳам насиб этавермайди. Конференция ёш олимларга шундай имкониятни тухфа этади.

Давлатимиз томонидан анжуманда иштирок этадиган чет эллик меҳмонлар учун барча қулай шароитлар яратилганини ҳам алоҳида таъкидлаш жоиз.

— **Геология ва кончилик йўналишида тахсил олаётган талабалар амалиётларини қаерда олиб боради? Умуман, университетда ёш олимлар билан ишлаш тизими ҳақида тўхталсангиз.**

— Бу тизим яхши йўлга қўйилган. Хусусан, илмий тадқиқот ва инновацион бўлим ташкил этилган. Илмга иштиёқи баланд ёшларни танлаш, уларга мавзу бериш ва тарбиялаш, пировардида химояга олиб чиқиш — бу каби вазифалар кафедра ўқитувчилари зиммасига юклатилган. Кафедралардаги фан докторлари, академиклар ёш олимлар билан ишлайди. Устоз-шоғирдлик аънанаси яхши йўлга қўйилган.

Геология ва кончилик факультетида икки минг нафарга яқин талаба тахсил олмақда. Уларни амалиётга йўналтириш тизимли олиб борилади. Биринчи ва иккинчи курс талабалари учун ўқув амалиёти университетнинг ўқув по-

лигонларида амалга оширилади. Учинчи курс талабалари малакавий амалиётга жалб этилади, тўртинчи курс талабалари учун биринчи чоракда битирув-малакавий иши олди амалиёти, кейин битирув-малакавий амалиёти ташкил этилган. Талабаларимиз Олмалик, Навоий, Деҳқонобод, Ангрэн ва Бекободдаги корхоналарда танлаган мутахассислиги бўйича ишлайди. Имкон доирасида ишлаб чиқаришда иштирок этади. Амалиётдан кейин эса натижаларни сарҳисоб қилиш мақсадида конференция ташкил этилади. Талабалар ўзларининг қилган ишлари, ўрганган фаолияти ҳақида фикр алмашади. Ишлаб чиқаришда учраётган муаммолар муҳокама қилиниб, уларнинг ечими юзасидан тадқиқот ишлари олиб борилади. Шу йўллар билан амалиётни ҳам қизиқарли, ҳам фойдалим ўтказишга ҳаракат қиламиз.

— **Ёш олимларнинг илмий тадқиқотлари амалиётга қандай татбиқ этилади?**

— Баъзан билиб-билмай, «Илмий иш бажарилди ва амалиётга татбиқ этилди» деган нотўғри ибора ишлатилади. Бу гап хўжалик шартномаси асосида иш олиб борган тадқиқотларга тегишли. Кончилик ва металлургия соҳасидаги диссертациялар эса амалиётга татбиқ этилиб, иқтисодий самара олингандан кейингина химояга тавсия этилади. Илмий иш қилишда шундай тартиб белгилангани, диссертация ишидан олинган иқтисодий самара кўрсатилиши шарт. Бу масала муҳокама-ларда кўриб чиқилади. Ҳеч бўлмаганда, қисман амалиётга татбиқ этилиши лозим.

Яна шундай илмий тадқиқот ишлари борки, улар давлат гранти асосида амалга оширилади. Унда долзарб муаммолар базасидан муайян бир масала танланиб, ёш тадқиқотчиларга ечимини топиш мақсадида берилади. Давлат томонидан молиялаштирилган бу каби ишларда тадқиқотчи маълум муд-

дат ичида шу муаммонинг ечимини топиши керак. Бу ҳам ёшларга яратилаётган кенг имкониятлардан биридир.

— **Ўзингизнинг илмий фаолиятингиз ҳақида ҳам ўртоқлашсангиз.**

— Соҳада қирқ йилдан бери фаолият юритиб келяпман. Ҳозирда икки йўналишда иш олиб бораёғимиз. Бугунги кунда юртда кўмир саноатини ривожлантириш долзарб масалалардан бири ҳисобланади. Шу сабабли кафедрамиздаги битта йўналишни кўмир соҳасидаги тадқиқот ишларига бағишладик. Айни пайтда иккита магистрант шоғирдим шу соҳадаги долзарб масалалар юзасидан илмий изланаяпти. Давлатимизнинг қўллаб-қувватлаши натижасида «Ер ости бойликларидан оқилона фойдаланиш муаммолари» номли илмий ўқув ва ишлаб чиқариш маркази тузилди. У марказ 2015 йилдан ўз фаолиятини бошлайди. Марказда ер ости бойликлари билан боғлиқ муаммоларга йўналтирилган илмий тадқиқот ишлари олиб борилади.

Инженер-техник ходимларнинг малакасини ошириш ҳам муҳим масалалардан бўлиб қолмоқда. Шу сабабли марказ қошида фаолиятимизнинг бир турини малака оширишни ташкил этишга йўналтирдик. Унда кончилик соҳасидаги мутахассисларнинг малакасини ошириб борамиз.

Ўзбекистонда янги — саноат хавфсизлиги соҳаси пайдо бўлди. Бу соҳада юртимизда мутахассис тайёрланмаслиги сабабли унга ёндош соҳалардан шундай кадрларни тайёрлаш йўлга қўйилмоқда. Марказда мазкур соҳа бўйича экспертларни тайёрлаш, саноат хавфсизлиги бўйича раҳбар ходимларнинг малакасини ошириш кўзда тутилган. Шунингдек, марказда ер ости бойликларидан оқилона фойдаланиш ва ер қазини муҳофазалаш йўналишида ҳам илмий ишлар олиб борилади.

Назокат ҚУРБОННЌЗОВА,
«Turkiston» мухбири

Xalqaro forum

Болаларнинг ижтимоий ҳимояси эътибор марказига

Пойтахтимизда «Болалар учун ижтимоий ҳамкорлик: миллий ва халқаро тажриба» мавзuida халқаро форум бўлиб ўтди. Нуфузли анжуманда Олий Мажлис сенатор ва депутатлари, халқаро ташкилотлар, давлат ва жамоат тузилмалари вакиллари, хорижий ҳамда маҳаллий экспертлар иштирок этди.



Болаларнинг ижтимоий ҳимояси масаласига бағишланган халқаро форумлар юртимизда 2005 йилдан буён мунтазам ўтказиб келинмоқда. Навбатдагиси «Бола ҳуқуқлари тўғрисида»ги Конвенция қабул қилинганига чорак аср тўлган вақтга тўғри келди. Мазкур конвенцияни Ўзбекистон 1992 йилда ратификация қилган. Унинг асосида «Бола ҳуқуқларининг кафолатлари тўғрисида»ги Ўзбекистон Республикаси қонуни ишлаб чиқилиб, амалиётга татбиқ этилганини ҳам таъкидлаш лозим.

Умуман олганда, сўнгги йилларда мамлакатимизда болалар ижтимоий ҳимояси бўйича мустақам қонунчилик базаси ҳамда ўзига хос тизим яратилди. Истиклолнинг дастлабки йиллариданоқ кўп болали оилалар, жисмоний имконияти чекланган, етим ва ота-она қармоғидан маҳрум бўлган болаларни ижтимоий муҳофаза қилиш ва қўллаб-қувватлаш бўйича йирик дастурлар амалга оширилмоқда.

Бугунги кунга келиб Ўзбекистон тажрибасини халқаро ташкилотлар мутахассислари муносиб эътироф этмоқда. Хусусан, форумнинг ялпи мажлисида сўз олган ЮНИСЕФ эксперти, руминиялик социология фанлари доктори Смаранда Попа миллий қонунчилигимизда фахрланса арзийдиган нормалар борлигини қайд этди.

— Ўзбекистонда яқиндагина кучга кирган «Ижтимоий шериклик тўғрисида»ги қонун менда катта таассурот қолдирди, — деди у. — Унда «ижтимоий шериклик» тушунчаси анча кенг маънода талқин этилади. Яъни мазкур жараёнга нафақат давлат органлари, балки нодавлат

ташкилотлар, ҳатто бизнес тузилмалари жалб этилиши мумкин. Болаларнинг ижтимоий ҳимояси масаласига ҳам шу жиҳатдан ёндашилмоқда. Бу анчайин самарали йўл.

2014 йилнинг 25 сентябрида қабул қилинган «Ижтимоий шериклик тўғрисида»ги қонун аҳолининг турли қатламларига алоқадор ижтимоий муаммолар, шу жумладан, етим ҳамда имконияти чекланган болаларнинг ижтимоийлашуви муаммосини ҳал этишда давлат ва жамият ўртасида амалий диалогни бошлашга тўртки берди. Қонун борасида ЮНИСЕФнинг мамлакатимиздаги ваколатхонаси раҳбари Роберт Фудерич ҳам ижобий фикр билдирди.

— Ўзбекистонда болаларнинг ҳуқуқ ва манфаатларини таъминлаш, ривожланиши учун қулай муҳит яратиш йўлида давлат ва жамоат ташкилотлари биргаликда ҳаракат қилади, — деб таъкидлади Р.Фудерич. — Бу ҳолат «Ижтимоий шериклик тўғрисида»ги қонунда мустақамланган. Бола учун энг мақбул муҳит, шубҳасиз, оиладир. Шу туфайли ЮНИСЕФнинг болалар ижтимоий ҳимоясига йўналтирилган барча дастурлари марказида оила туради.

Болаларни ижтимоий ҳимоялаш тизими жамиятнинг барча соҳаларини қамраб олган. Ижтимоий шериклик эса таълим, соғлиқни сақлаш, ҳуқуқни муҳофаза қилиш каби муҳим компонентлар бўйича масъул давлат ва фуқаролик жамияти институтлари саъй-ҳаракатини ягона мақсад атрофида бирлаштиришнинг ниҳоятда самарали механизми экани жаҳон тажрибасидан яхши маълум.

Халқаро форумнинг очилишида хорижий экспертлардан таш-

қари, Халқ таълими вазири Улғубек Иноят, Соғлиқни сақлаш вазири Анвар Алимов, Олий ва ўрта махсус таълим вазири Алишер Ваҳобов, Ўзбекистон Республикаси Бош прокурори ўринбосари Шерзод Матиев, Инсон ҳуқуқлари бўйича Миллий марказ директори Акмал Саидов ҳам ўз маърузаларини тақдим этди.

Ялпи мажлисдан сўнг форум иши учта шўбада давом этди. Иштирокчилар алоҳида эътиборга муҳтож болаларнинг ижтимоийлашуви бўйича инновацион стратегия, ота-она қармоғисиз қолган болалар ҳақида ғамхўрлик қилишнинг институционал тизimini модернизациялаш ҳамда вояга етмаганлар назоратсизлиги ва ҳуқуқбузарлиги профилактикаси юзасидан ижтимоий шериклик масалаларини атрофлича муҳокама қилиб, ўзаро тажриба алмашди. Эксперт-мутахассислар ҳамда давлат органлари вакиллари ўртасидаги конструктив мулоқот ижтимоий шериклик соҳасида келгусидаги ҳамкорлик стратегиясини ишлаб чиқиш, унинг самарали усулларини идоралараро даражада ривожлантириш орқали ўзаро муносабатлар тизimini шакллантириш, шунингдек, болаларни ижтимоий ҳимоя қилишнинг миллий тизimini такомиллаштириш юзасидан таклифлар тўплаш имконини берди.

Халқаро форум натижасида ўзбек, рус ва инглиз тилларидаги мақола ва тезислар тўплами чоп этилди.

Халқаро форумнинг очилишида Ўзбекистон Республикаси Бош вазирининг ўринбосари А.Икромов сўзга чиқди.

Наргиза УМАРОВА,
«Turkiston» мухбири

Xabarlar

«Камолот» ЁИХ томонидан ёшларни давлат ҳокимияти органлари тизими ва фаолияти билан яқиндан таништириш мақсадида Олий Мажлис Қонунчилик палатаси билан ҳамкорликда мунтазам равишда турли тадбир ва учрашувлар ўтказилмоқда.

«Камолот»чилар депутатлар билан учрашди

Ана шундай учрашувлардан бири парламент биносида бўлиб ўтди. Унда депутатлар ҳамда Фарғона давлат университетидан келган «Камолот»чилар иштирок этди.

Учрашувда депутатлар мамлакатимизда амалга оширилаётган демократик ислохотлар, ёшларнинг ҳуқуқ ва манфаатларини ҳимоя қилишга қаратилган қонун ҳамда қонуности ҳужжатларининг яратилиш жараёни, уларнинг аҳамияти ҳақида тушунчалар берди.

Тадбир якунида ёшлар депутатларнинг фаолияти билан яқиндан танишди.

Жавлон ВАФОВЕВ,
«Turkiston» мухбири

Тадраккур энг яхши қурол

Бухоро автомобиль ва йўллар касб-хунар коллежида «Ёшларни огоҳликка чорлаймиз» мавзuida давра суҳбати бўлиб ўтди.

Коллеж ўқитувчилари ва ўқувчилари иштирок этган тадбирда бугунги куннинг мафкуравий қиёфаси, инсон қалби ва онги учун кечаётган қураллар, ахборот хавфсизлиги каби долзарб мавзулар муҳокама қилинди.

— Озгина лоқайдлик ҳам бугунги глобаллашув даврида жуда қимматга тушиши мумкин. Фақат юксак маънавиятни, илму тафаккурни қурол қилган инсонгина ўзлигини йўқотмайди, — деди шаҳар бош имом-хатиби Отабек Авезов. — Бу жа-

раёнда асосий эътиборни фарзандларимизга қаратиш, уларни турли маънавий хуружларга қарши ўз ақл-заковати, билими билан жавоб берадиган авлод қилиб тарбиялашимиз лозим.

Давра суҳбатида миссионерлик, диний ақида-парастлик каби иллатлар, уларнинг олдини олиш чора-тадбирлари ҳақида муҳим маълумотлар берилди.

Манзура РАУПОВА,
Бухоро автомобиль ва йўллар касб-хунар коллежи ўқитувчиси

Соғлом турмуш тарзидоримиз

«ОИТС — аср вабоси!». Қорақалпоқ давлат университетидан ўтказилган тадбир шундай номланди.

Ёшлар орасида соғлом турмуш тарзини тарғиб қилиш, уларни бундай иллатлардан огоҳ этиш мақсадида ташкил этилган тадбирда профессор-ўқитувчилар, Ибн Сино номидаги саломатлик маркази ходимлари, «Камолот» ЁИХ фаоллари ҳамда талаба-ёшлар қатнашди. Тадбир давомида мавзуга доир маърузалар тингланди, сахна кўринишлари намойиш этилди.

Иштирокчиларнинг саволларига Ибн Сино номидаги саломатлик маркази мутахассислари жавоб берди.

Тадбир сўнгида талабалар ўртасида ёшларнинг маънан баркамол, жисмонан соғлом бўлишига қаратилган «Мен ОИТСга қаршиман!» мавзuida мақолалар ҳамда расмлар танловини ўтказишга келишиб олинди.

Хурлиман НУРЖОНОВА,
Қорақалпоқ давлат университети талабаси

1 savolga 1 javob

Меросга бўлган ҳуқуқ тўғрисидаги гувоҳнома қай йўсинда олинади? Шу ҳақда маълумот берсангиз.

Ўткирбек Холматов,
Фарғона вилояти

Саволга Зангиота туманидаги 6-давлат нотариал идораси нотариуси Ҳабибулло Пўлатов жавоб беради.

Мерос (ворислик) ва сият ва қонун бўйича амалга оширилади.

Агарда биридан кейин бошқаси мерос олишга ҳақли бўлган шахслар бир кун (24 соат) ичида вафот этган бўлса, улар бир вақтда

вафот этган деб ҳисобланади, мерос уларнинг ҳар биридан кейин очилади ва улардан ҳар бирининг меросхўрлари ворисликка қақширилади.

Мерос қолдирувчининг охириги доимий

яшаб турган жойи (пропискаси бўйича) мероснинг очилган жойи ҳисобланади. Агар мерос қолдирувчининг охириги яшаб турган жойи номаълум бўлса, мерос қолдирувчига тегишли бўлган кўчмас мулк ёки унинг асосий қисми турган жой мерос очилган жой деб ҳисобланади.

Мерос очилган пайтда ҳаёт бўлган фуқаролар, шунингдек, мерос қолдирувчининг ҳаётлик пайтида ҳомила ҳолида бўлган ва мерос очилгандан кейин тирик тузилган фарзандлари ва сият ва қонун бўйича ме-

росхўр бўлиши мумкин.

Мерос қолдирувчининг болалари (шу жумладан, фарзандликка олинган болалари), эри (хотини), ота-онаси (фарзандликка олувчилар) тенг улушларда қонун бўйича биринчи навбатдаги меросхўр ҳисобланади.

Мерос очилган жойдаги нотариус меросхўрнинг илтимосига кўра унга меросга бўлган ҳуқуқ тўғрисида гувоҳнома бериши шарт.

Меросга бўлган ҳуқуқ тўғрисида гувоҳнома мерос очилган кундан эътиборан олти ой ўтгандан кейин берилади.

Шаҳон опера юлдузлари Ўзбекистон сахнасида

(Давоми, бошланиши
1-саҳифада)

В.Успенский номидаги Республика ихтисослаштирилган мусиқа академик лицейида танловнинг саралаш босқичи ўтказилди. Унда Ўзбекистон давлат консерваториясининг қирқ нафардан зиёд талаба ва битирувчиси, Алишер Навоий номидаги давлат академик катта театрининг хонанда ҳамда стажёрлари XX асргача яратилган опера асарларини италян тилида ижро этиш бўйича ўз истеъдодини намоиш этди.

— «Competizione dell'Opera» танлови ёш операчиларга катта имконият яратиб бермоқда. Ҳар бир иштирокчи дунёнинг нуфузли сахналарида ўз ижроси билан қатнашиш, юксак чўққиларни забт этишга бўлган иштиёқини намоён этади. Шу жараёнда тажриба алмашиш эса, энг муҳим жиҳатлардан бири деб ўйлайман, — дейди республика ва халқаро танловлар совриндори Шаҳноза Ибрагимова. — Нуфузли танловда иштирок этаётганимиз катта аҳамиятга эга. Мен ярим финал босқичида «Турандот» операсидан «Лиу» ариясини ижро этдим.

Ўзбекистонда опера санъатининг юксалиб бораётгани ва бу соҳада ижод қилаётган истеъдодли ёшларнинг кўп экани кучли рақобат муҳитида ўтган саралаш босқичида ўз тасдиғини топди.



ЎзА фотомухбири Ёлқин ШАМСИДИННОВ олган суратлар

— Ёш операчиларимиз танловга пухта тайёргарлик кўрганини намоиш этди. Голибликка даъвошиш эса, энг муҳим жиҳатлардан бири деб ўйлайман, — дейди республика ва халқаро танловлар совриндори Шаҳноза Ибрагимова. — Нуфузли танловда иштирок этаётганимиз катта аҳамиятга эга. Мен ярим финал босқичида «Турандот» операсидан «Лиу» ариясини ижро этдим.

Танлов нафақат дунёнинг барча қитъаларидан саралаш босқичларидан ўтиб келган ёш опера ижрочилари билан, балки ҳакамлар ҳайъати таркибида жаҳоннинг энг тажрибали ва кўзга кўринган опера юлдузлари борлиги билан эътиборга

молик.

Маданият ва спорт ишлари вазирлиги, «Competizione dell'Opera» халқаро танлови ассоциацияси, «Ўзбектеатр» ижодий ишлаб чиқариш бирлашмаси, Алишер Навоий номидаги давлат академик катта театри билан ҳамкорликда юртимизда илк бор ўтказилаётган мазкур танлов мамлакатимизда опера санъати ва унинг намоёндалари, шунингдек, иқтидорли ёшларни кашф этиш ва рағбатлантиришга қаратилган эътиборнинг халқаро эътирофидир.

Кейинги йилларда мамлакатимизда санъат ва маданият, хусусан, классик

опера санъатига алоҳида эътибор қаратилмоқда. Бугун ўзбек операчилари жаҳоннинг қатор нуфузли танловларида ўзининг муваффақиятли иштироки билан дунё ҳамжамиятининг эътирофига сазовор бўлмоқда. 2012 йили Беларусь пойтахти Минскда ўтказилган «Competizione dell'Opera» танловида ватандошимиз Раҳим Мирзакамоллов биринчи, 2013 йили Австриянинг Линц шаҳрида ўтказилган танловда Рамиз Усмонов иккинчи ўринни қўлга киритгани сўзимизнинг яққол исботидир.

Парвина ОМОНОВА,
«Turkiston» мухбири

Saylov — 2014

2014 йилги сайловни ёритиш бўйича республика матбуот марказида «Сайловда иштирок этиш — менинг конституциявий ҳуқуқим» мавзусида давра суҳбати бўлиб ўтди.

ЁШЛАР САЙЛОВДА ФАОЛ ИШТИРОК ЭТАДИ

Ўзбекистон Республикаси Марказий сайлов комиссияси томонидан «Камолот» ёшлар ижтимоий ҳаракати билан ҳамкорликда ташкил этилган ушбу тадбирда Марказий сайлов комиссияси аъзолари, Ўзбекистон Республикаси Президенти ҳузурдаги Давлат бошқаруви академияси экспертлари, «Камолот» ёшлар ижтимоий ҳаракати масъул ходимлари ва фаоллари, оммавий ахборот воситалари вакиллари иштирок этди.

Марказий сайлов комиссияси раисининг ўринбосари С.Ортиқова ва бошқалар фуқаролар, шу жумладан, ёшларнинг сиёсий жараёнларда фаол иштироки демократик ҳуқуқий давлат ва кучли фуқаролик жамиятини қуришда муҳим омиллардан бири эканини таъкидлади. 2014 йилда Ўзбекистон Республикаси Олий Мажлиси, халқ депутатлари вилоят, туман ва шаҳар Кенгашлари сайловига тайёргарлик кўриш ва уни ўтказиш бўйича тадбирлар дустури ижросини таъминлаш доирасида ёшларнинг сайлов кампаниясида фаол иштирок этиши, ижтимоий фаоллиги ва ҳуқуқий маданиятини оширишга қаратилган чора-тадбирлар амалга оширилди.

Тадбирда сўнгги йилларда сайлов қонунчилигига киритилган ва миллий сайлов тизимини янада демократлаштириш ҳамда эркинлаштириш, сайлов жараёнининг очиқлик ва ошқоралик принципларини мустаҳкамлашга қаратилган ўзгартиш ва қўшимчаларнинг мазмун-моҳиятига бағишланган маърузалар тингланди.

Бундай янгиликларни ёшларга етказишда «Камолот» ёшлар ижтимоий ҳаракати ҳам фаол иштирок этаётгани қайд этилди. Манфаатдор вазирлик ва идоралар билан ҳамкорликда «Ўзбекистон Республикаси Конституцияси — давлат равнақи ва жамият фаровонлигининг ҳуқуқий кафолати» лойиҳаси амалга оширилмоқда. Мазкур лойиҳа доирасида ҳаракат фаоллари «тенгдош-тенгдошга» тамойили асосида жойларда ёшларнинг сайлов тўғрисида хабардорлигини оширишга қаратилган анжуманлар ўтказмоқда.

Шунингдек, «Ватан келажаги сенинг қўлингда!» шиори остида турли тадбирлар ташкил этилмоқда. «Юрагингдан овоз бер!», «Сенинг овозинг ҳал қилувчи аҳамиятга эга!», «Биринчи марта овоз бераман!», «Фуқаролик позициянгни намоён эт!» мавзуларида видеороликлар, баннер ва буклетлар тайёрланди. Бундан ташқари, Ўзбекистон Миллий телерадиокомпанияси каналлари, нодавлат теле ва радиостанциялар орқали сайлов қонунчилиги нормалари ҳақида ёш сайловчиларни хабардор қилиш, уларнинг фуқаролик позициясини мустаҳкамлашга қаратилган ижтимоий роликлар эфирга узатилмоқда.

ЎЗА

2014-yil — Sogʻlom bola yili

БИЗ, ВАТАН ФАРЗАНДЛАРИ — УМИД НИҲОМАРИМИЗ

«Туркистон» саройида 23 ноябрь куни «Биз, Ватан фарзандлари — умид ниҳолларимиз» шиори остида «Ниҳол» мукофоти совриндорларининг ҳисобот концерти бўлиб ўтди.

Ўтган йиллар мобайнида ушбу юксак мукофотга сазовор бўлган ёш истеъдодларнинг мусиқий дастури санъат ихлосмандлари эътиборига ҳавола этилди.

Мусиқа санъати воситасида ёшлар маънавиятини юксалтириш, уларни ватанпарварлик, фидойилик, истиқлол ғояларига садоқат, миллий ва умумбашарий қадриятларга ҳурмат руҳида тарбиялаш Президентимиз Ислам Каримов раҳнамолигида маънавий-маърифий соҳаларда амалга оширилаётган кенг қўламли ислохотларда устувор аҳамият касб этади.

Давлатимиз раҳбари ташаббуси билан 2000 йилда таъсис этилган «Ниҳол» мукофоти мусиқа хонандалиги ва ижрочилиги, хореография соҳасида изланаётган ёшларнинг ижодий фаолиятини янада юқори босқичга кўтариш, уларни моддий ва маънавий қўллаб-қувватлаш, янги ижодий парвозлар сари руҳлантиришда муҳим аҳамият касб этмоқда. Ушбу мукофот эстрада, мусиқа, мумтоз кўшиқ, рақс ва опера санъати ижрочилиги соҳасидаги маҳорати билан юртдошларимизга манзур бўладиган асарлар яратишда фаоллик кўрсатаётган 17 ёшдан

25 ёшгача бўлган иқтидорли ёшларни рағбатлантириш мақсадида берилаётир.

Бу йўналишдаги амалий саъй-ҳаракатлар одамларнинг юрагига етиб борадиган, эзгуликка чорлайдиган, ирода ва имон-эътиқодини мустаҳкамлашга хизмат қиладиган асарлар яратиш, мусиқа санъати ёш ихлосмандларининг бадиий-эстетик диди ва савиясини ошириш каби эзгу ишларга қаратилгани билан аҳамиятлидир.

«Ниҳол» мукофоти билан тақдирланган кўплаб ёш хонандалар, ижрочилар, раққосалар юртимиздаги турли мусиқий анжуманлар, байрам тадбирларида фаол иштирок этиб келмоқда. Энг қувонарлиси, ёшларимизнинг халқаро миқёсдаги нуфузли кўрик-танловлар, санъат фестивалларида қўлга киритаётган ютуқлари салмоғи йилдан-йилга ортиб бормоқда.

«Соғлом бола йили» Давлат дастури ва Президентимизнинг 2014 йил 6 февралда қабул қилинган «Ўзбекистон Республикасида ёшларга оид давлат сиёсатини амалга оширишга қаратилган қўшимча чора-тадбирлар тўғрисида»ги қарорига мувофиқ истеъдодли ёшларнинг мусиқий, бади-

Назокат УСМОНОВА,
ЎЗА мухбири

Mutaxassis
ogoh etadi

Биргина лоқайдлик, эътиборсизлик оқибатида юзага келадиган ёнғинлар халқ хўжалигига ва мамлакат иқтисодиётига катта зарар етказиши мумкин. Шунингдек, оловдан ажралиб чиқадиган кўп миқдордаги заҳарли газлар атмосферага кўтарилиб, ҳаво таркибини ҳам бузади.

КУНДАЛИК
ВАЗИФАМИЗ

Мамлакатимизда ёнғин хавфсизлигини таъминлаш, ушбу соҳада юқори малакали мутахассисларни тайёрлаш, «тилсиз ёв»нинг олдини олиш ва бартараф этишга доир самарали ишлар амалга ошириляпти.

Ҳар йили юртимизда ёнғин хавфсизлиги ойлиги ўтказиб келинади. Бундан кўзланган асосий мақсад аҳоли яшаш жойларида, корхона ва ташкилотларда тушунтириш ва тарғибот ишларини олиб боришдан иборатдир.

Ёнғин хавфсизлигини таъминлаш ҳар биримизнинг бурчимиз. Фақатгина ойлик давомида эмас, ҳаммиша хавфсизлик қоидаларига риоя қилишимиз лозим.

Асом ҚАМБАРОВ,
Тошкент шаҳар ИИББ ЁХБ
28-ҲЁХҚ инспектори,
сержант

Tengdosh portreti

Шу жоатли
Шаҳодат

Нукус олимпия захиралари спорт коллежи ўқувчиси Шаҳодат Жўллубоева эркин кураш бўйича Ўзбекистоннинг беш карра чемпиони, уч карра Осиё чемпионати собриндори. Бу йил эса Хитойнинг Нанкин шаҳрида ўтказилган ўсмирлар ўртасидаги II Олимпия ўйинларида юртимиз шарафини муносиб ҳимоя қилди.

Аслида, унча-мунча спортчи медаллар «юк»ини кўтара олмайди. Йўқ, гап медалларнинг сони ва неча килограмм тош босиши ҳақида эмас. Уларнинг ортидан

келадиган шуҳрат, обрў-эътиборни «кўтара» олмасдан, юлдузлик касалига чалиниб юрганлар ҳақон спортида кам дейсими? Яқинлари, мураббийлари, дўсту



дугоналарининг айтишича, илк бор елкасига сумкасини тақиб, спорт залига кириб келган Шаҳодат билан мамлакат чемпиони Шаҳодат деярли ўзгармаган. Яъни у ўзининг ўша камтар, самимий, ҳушчақчақлигини сақлаб қолган. Тўғри, у ўтган йиллар давомида дунёқараши кенгайди, кўп билим олди. Муҳими, нимаки ўрганган бўлса, уни фақат яхшилик йўлида, юксак мақсадлар учун сарфляпти.

— Шаҳодат иқтидорли шогирдларимдан, — дейди мураббийи Азамат Примбетов. — Кўрсатмаларимга тўлиқ амал қилиш билан бирга, мустақил равишда ҳам шуғулланишни билади. Профессional спортчининг вазифаси фақат мураббий олдида топшириқларни бажариш эмас. Спорт формасини сақлаб туриш учун у ҳаммиша тартибга амал қилиши керак. Шаҳодат ўз олдида катта мақсадларни қўйган, бу йўлда тинимсиз меҳнат қилади.

Кумар БЕГНИЯЗОВА,
«Turkiston» мухбири.

ЎЗА фотомухбири
Мақсад ҲАБИБУЛЛАЕВ олган суратлар

Biznesga ilk qadam



Жаҳонгир Тошпўлатов Қизилтепа агросервис касб-ҳунар коллежини тамомлаб, 2011 йилдан буён яқка тартибдаги

тадбиркорлик билан шуғулланмоқда.

Ганчкорлик санъатини эгаллаган. Шогирди билан бирга хона-

дон, тўйхона, турли ташкилот биноларининг ташқи ва ички безаги учун гипсдан композициялар ясайди. Моҳир уста-тадбиркор нафақат Навоий, балки қўшни Самарқанд ва Бухоро вилоятларидан ҳам буюртмалар олади.

Бу йил Жаҳонгир «Камолот» ёшлар ижтимоий ҳаракати ўтказган «Юрт келажаги» иқтидорли ёшлар кўрик-танловида ўз ҳунарини намойиш этди. Шунингдек, «Ёш тадбиркор — юртга мададкор» лойиҳасида қатнашиб, голиб бўлди.

— Банқдан имтиёзли шартлар асосида 45 миллион сўм кредит олдим, — дейди тенгдошимиз. — Кейинги йилдан хусусий корхона очаман. Бутун республика бўйлаб буюртмалар қабул қилиб, фаолиятимни кенгайтириш ҳисобига 20 нафаргача коллеж битирувчисини ишга олишим мумкин. Келгусида қурилиш моллари дўкони ва қандалат цехига ҳам сармоя киритиш ниятим бор.

Наргиза БАҲОДИРОВА.
Носир Ҳайдаров олган сурат

Зуқко мухлисга
САВОЛ:

«Бобурнома»да табиат манзараси чиройли тасвирланади, мамлакатлар, жумладан, Ҳиндистон иқлими, ўсимликлар дунёси, ҳайвонот олами ҳақида кўп маълумот берилган. Бу ўлкада бир мавсум борлиги, унда тинимсиз ёмғир ёғиб, натижада дарёлар суви тошиб кетиши акс этган. Айтинг-чи, Бобур тавсифлаган ёмғир мавсуми Ҳинд диёрида нима деб аталган?

Жавобингизни 28 ноябрь соат 16:00га қадар 233-79-69, 233-95-97 телефон рақамлари орқали билдиришингиз мумкин. Тўғри жавоб йўллаган мухлислар номи газетамизда эълон қилинади.

Ўтган сондаги саволнинг жавоби:
Тригонометрия.

Термиз шаҳридаги 13-мактаб ўқитувчиси Гулчехра Ашурова тўғри жавоб йўллади.

Тлафаккур қилмондан бир қатра

Ёлғон ўзи унча хавфли эмас, унинг ҳақиқатга ўхшаб кетиши хавфли.

Асқад Мухтор